

SA MINIATUURPERD



SUID-AFRIKAANSE MINIATUURPERD TELERSGENOOTSKAP

GRONDWET

Gewysig 14/09/2002
Gewysig 29/01/2004
Gewysig 17/09/2005
Gewysig 15/09/2007
Gewysig 26/09/2009
Gewysig 03/09/2010
Gewysig 05/11/2011
Gewysig 19/10/2013
Gewysig 23/01/2016
Gewysig 12/11/2016
Gewysig 04/11/2017
Gewysig 10/11/2018

INHOUDSOPGAWE

WOORDOMSKRYWING	4
-----------------------	---

KLOUSULES

1. NAAM VAN DIE GENOOTSKAP	6
2. DOELSTELLINGS	6
3. MAGTE VAN DIE GENOOTSKAP	7
4. LIDMAATSKAP	7
5. REGISTER VAN LEDE	9
6. REGTE EN VOORREGTE VAN LEDE	9
7. LEDEGELD EN GELDE	10
8. BEDANKINGS, SKORSING EN OPHEFFING VAN STEMREG VAN LEDE.....	10
9. HERAANSLUITING VAN LEDE	12
10. RAAD EN DIE UITVOERENDE KOMITEE	12
11. MAGTE EN PLIGTE VAN DIE RAAD	13
12. VERGADERINGS.....	16
13. NOTULES VAN VERGADERINGS.....	18
14. FINANSIËLE BEPALINGS	18
15. LIDMAATSKAP VAN DIE VERENIGING EN AFFILIASIE	19
16. VERKIESING VAN VERTEENWOORDIGER/S TOT DIE ALGEMENE JAARVERGADERING VAN DIE VERENIGING	19
17. GRONDWETLIKE WYSIGINGS	19
18. KANTOOR VAN DIE GENOOTSKAP	19
19. ONTBINDING OF LIKWIDASIE VAN DIE GENOOTSKAP	20
20. OORDRAG VAN BEVOEGDHEDE	20
21. NIE-LEDE.....	20
22. OUTENTIEKE LESING VAN HIERDIE GRONDWET.....	20
23. PLIGTE VAN STREEKSVERTEENWOORDIGERS.....	20

ALGEMENE VERORDENINGE

1.	KUDDEBOEK	21
2.	VOORVOEGSEL EN KENMERKLETTER	22
3.	IDENTIFIKASIE.....	22
4.	NAME	22
5.	KENNISGEWING VAN GEBOORTES	22
6.	DIE GESAMENTLIKE BESIT VAN HINGSTE	23
7.	DRAGTIGHEIDS- EN INTERVULLINGSPERIODE	23
8.	VEREISTES VIR AANTEKENING EN REGISTRASIE.....	23
9.	KEURING EN PLIGTE VAN DIE KEURDER/S EN PRODUKSIE- VEREISTES	25
10.	REKORDS VAN DIERE	25
11.	REËLS MET BETREKKING TOT KUNSMATIGE INSEMINERING (K.I.)	26
12.	REËLS MET BETREKKING TOT DIE OPVANG VAN EISELLE EN EMBRIO-OORPLASINGS (E.O.)	27
13.	INGEVOERDE EISELLE	27
14.	REGISTRASIESERTIFIKATE	28
15.	DNS TOETSE	28
16.	OORDRAGTE	29
17.	HERSTEL VAN DIERE IN DIE KUDDEBOEK.....	30
18.	KANSELLERING VAN AANTEKENING OF REGISTRASIE.....	30
19.	WERKNEMERS VAN DIE GENOOTSKAP	30

GRONDWET

VAN DIE

S A MINIATUURPERD TELERSGENOOTSKAP VAN SUID-AFRIKA

WOORDOMSKRYWING

1. Wanneer dit in hierdie Grondwet gebruik word en 'n strydige bedoeling nie duidelik uit die verband blyk nie, beteken –

"**aantekening**", die prosedure van aantekening in die Basis Afdeling van die Kuddeboek;

"**Departement**", die Departement van Landbou in die Nasionale regering;

"**dier**", 'n Miniatuurperd wat in die Kuddeboek aangeteken of geregistreer is of daarvoor geskik is, en die woorde "Hings/te", "Merrie/s", "Perd/e" en "Vul/lens" sal dieselfde betekenis hê;

"**eienaar**" (van 'n dier) die persoon wie

- (a) (volgens die rekords van die Vereniging) sodanige dier besit, of
- (b) tot bevrediging van die Raad bewys lewer dat sodanige dier geskik is om in sy naam aangeteken of geregistreer te word;

"**eisel**", 'n eisel van 'n dier en sluit ook 'n embrio in;

"**embrio**", 'n bevrugte eisel van 'n dier;

"**Gebied**", Suid-Afrika en sodanige ander lande soos van tyd tot tyd deur die Genootskap met die goedkeuring van die Vereniging bepaal;

"**geboorte**", die geboorte van 'n dier;

"**Genootskap**", Suid-Afrikaanse Miniatuurperd Telersgenootskap;

"**Grondwet**", die grondwet (met inbegrip van die Verordeninge van die Genootskap);

"**Intergis**", die geïntegreerde registrasie en genetiese inligtingstelsel wat bestuur word deur die Organisasie wat deur die Departement aangestel is;

"**keurder**", 'n persoon in die hoedanigheid as keurder deur die Raad aangestel;

"**koper**", die persoon of persone aan wie eienaarskap of gesamentlike eienaarskap van 'n dier oorgedra word deur die verkoper van sodanige dier;

"**Kuddeboek**", die Kuddeboek van die Genootskap waarin die besonderhede van alle diere ingeskryf word;

"**Minister**", die Minister verantwoordelik vir Landbou;

"**Raad**", die Raad van die Genootskap;

"**ras**", die Miniatuurperdras;

"**Registrateur**", die beampte ingevolge die Wet aangewys as Registrateur van Dierverbetering;

"**registreer**", die prosedure van registrasie van diere deur die Vereniging in die Hulpstamboek- en Volgeregistreeerde afdelings van die Kuddeboek, of waardeur 'n voorvoegsel deur die Vereniging op rekord geplaas word;

"**Sekretaris**", die Sekretaris van die Genootskap;

"**semen**", die semen van 'n dier;

"**n Suid-Afrikaansgeteelde dier**" (vir doeleindes van aantekening of registrasie), 'n dier wat in of onderweg na Suid-Afrika gebore is: Met dien verstande dat 'n dier wat gebore word uit 'n ingevoerde eisel, as 'n ingevoerde dier beskou word;

"**teler**" (van 'n dier), die eenaar van –

- (a) die moeder ten tyde van die geboorte van 'n dier,
- (b) sodanige dier tydens aansoek om aantekening of registrasie in die Kuddeboek, of
- (c) die draer merrie van sodanige embryo ten tyde van die geboorte van 'n vul as gevolg van 'n embryo-oorplasing;

"**Vereniging**", die Suid-Afrikaanse Stamboek- en Dierverbeteringsvereniging;

"**verkoper**", die persoon of persone wie die eenaar/gesamentlike eenaars van 'n dier is volgens die rekords van die Vereniging, of in die geval van 'n ingevoerde dier, die eenaar in die land van herkoms, wie sodanige dier verkoop het;

"**Vulboek**", die Vulboek van die Genootskap waarin die besonderhede van alle vullens aangeteken word ten opsigte waarvan geboortekennisgewings ingedien was; en

"**Wet**", die Wet op Dierverbetering, 1998 (Wet 62 van 1998), of enige verdere wetgewing met dieselfde doelstelling as in gemelde Wet, insluitende die regulasies uitgevaardig ingevolge daarvan.

2. Ander woorde, afkortings en terme gebruik in die Grondwet, wat nie hierbo omskryf is nie, en waaraan 'n bepaalde betekenis geheg word in die Wet, sal dieselfde beteken as in die Wet.
3. Tensy 'n teenstrydige bedoeling duidelik uit die verband blyk, sal alle woorde wat in die Grondwet na persone in die manlike geslag verwys, die vroulike geslag insluit en woorde in die enkelvoud, sal die meervoud insluit en woorde in die meervoud, sal die enkelvoud insluit.

GRONDWET

VAN DIE

S A MINIATUURPERD TELERSGENOOTSKAP

1. NAAM VAN DIE GENOOTSKAP

Die naam van die Genootskap is die Suid-Afrikaanse Miniatuurperd Telersgenootskap.

2. DOELSTELLINGS

2.1 Onderhewig aan die bepalings van die Wet en hierdie Grondwet is die doelstellings en magte van die Genootskap om –

2.1.1 die teelt en verbetering van die ras aan te moedig in die Gebied deur uitvoering te gee aan die magte en pligte verleen aan die Genootskap ingevolge die Wet ten opsigte van aantekening of registrasie van stambome by die Vereniging, invoer en uitvoer van diere, semen en eiselle, tegniese-, adviserende- en inspeksiedienste of op enige ander wyse;

2.1.2 die rasegtheid van diere in die Gebied te bewaar en om deur alle moontlike en beskikbare middele belangstelling in die ras te bevorder;

2.1.3 noukeurige verslae van die stambome en besonderhede van diere saam te stel, te bewaar en in stand te hou of te laat saamstel, bewaar en instandhou, met die doel vir aantekening of registrasie deur die Vereniging;

2.1.4 'n "Standaard van Voortreflikheid" vir die ras op te stel;

2.1.5 vir tentoonstellingsdoeleindes verskillende klasse vir die ras te verkry en beoordelaars te benoem wat bevoeg geag word om die ras te beoordeel; om landbougenootskappe en andere te oortuig van die wenslikheid en noodsaaklikheid daarvan om slegs beoordelaars aan te stel wat deur die Genootskap aanbeveel word;

2.1.6 die verkoop van diere te bevorder;

2.1.7 deur samewerking met die Vereniging en die Departement, voorligting te gee om die ras te verbeter;

2.1.8 in die algemeen alles in sy vermoë te doen ter bevordering van sy lede se belange met betrekking tot hul bedrywighede in verband met die ras; en

2.1.9 inligting in te win en te versprei aangaande die beste wyse waarop die teling van die ras die beste uitgevoer en op die voordeligste manier uitgebou en voortgesit kan word en lede op hoogte te hou met wetenskaplike- en ander ontwikkeling.

2.2 Die Genootskap –

(a) mag nie gemoeid wees met enige winsgewende bedrywighede, of deel hê in enige besigheids-, professionele- of beroepsbedrywighede van enige van sy lede, of die voorsiening aan enige van sy lede van geldelike hulp of van enige perseel of aanhoudende dienste of fasiliteite wat deur sy lede benodig word vir die beoefening van 'n besigheid, profesie of beroep nie; en

- (b) het nie die mag om besigheid te bedryf nie, insluitend, *inter alia*, gewone handelstransaksies in die loop van besigheid, spekulatiewe transaksies, dividend verminderingsaksies sowel as die aankoop van eiendom vir die verhuring daarvan op 'n stelselmatige of gereelde basis.

3. MAGTE VAN DIE GENOOTSKAP

Onderhewig aan die bepalings van die Grondwet sal die Genootskap die mag hê om –

- 3.1 sodanige funksies te vervul en pligte uit te voer soos deur die Wet neergelê asook kragtens sy lidmaatskap van die Vereniging en die verlening van regs persoonlikheid aan die Genootskap in terme van die Wet; en
- 3.2 in die algemeen stappe te neem soortgelyk aan dié wat 'n regspersoon by wetgewing kan verrig ten einde sy doelstellings te bereik.

4. LIDMAATSKAP

4.1 Verkiesbaarheid

Lidmaatskap van die Genootskap sal beperk word tot persone bo die ouderdom van 18 jaar.

4.2 Indeling van Lidmaatskap

Lidmaatskap sal uit die volgende lede bestaan –

4.2.1 Gewone lede

Persone wat in Suid-Afrika woon en wat direk of indirek by die teelt van diere betrokke is, kan vir lidmaatskap van die Genootskap as Gewone lede in aanmerking kom. Vir die doeleindes van hierdie subklousule word 'n maatskappy, private maatskappy, vennootskap of regspersoon beskou as 'n persoon en kan as sodanig vir Gewone Lidmaatskap van die Genootskap in aanmerking kom.

Persone wat aktiewe telers van diere is en sodanige diere ooreenkomstig hierdie Grondwet aanteken of registreer, sal as Aktiewe Gewone Lede bekend staan. Alle ander lede sal as Nie-Aktiewe Lede bekend staan.

4.2.2 Lewenslange-lede

Enige Gewone Lid mag met die goedkeuring van die Raad 'n Lewenslange-lid word deur die betaling van sodanige bedrag of ledegeld as wat die Raad mag bepaal. (Bylae A)

4.2.3 Lewenslange-erelede

Vir spesiale dienste gelewer in belang van die ras mag die Algemene Jaarvergadering 'n persoon tot Lewenslange-erelid verkies: Op voorwaarde dat dit op aanbeveling van die Raad geskied. Sodanige Lewenslange-erelid sal al die regte en voorregte van lidmaatskap geniet, insluitende stemreg by enige vergadering van die Genootskap en sal ook tot die Raad verkiesbaar wees.

4.2.4 Spesiale Erelede

Persone wie nie noodwendig aktief gemoeid is met die teelt van die ras nie, mag deur die Raad verkies word tot Spesiale Erelid: Op sodanige voorwaardes soos deur die Raad bepaal mag word. 'n Spesiale Erelid sal geen stemreg by die vergaderings van die Genootskap hê nie en ook nie tot die Raad verkiesbaar wees nie.

4.2.5 Junior Lede

Enige persoon onder die ouderdom van agtien jaar wat direk of indirek gemoeid is met die teelt

van Miniatuurperde, kan in aanmerking kom vir lidmaatskap van die Genootskap as Junior Lid: Met dien verstande dat 'n Junior Lid geen stemreg het nie en ook nie tot die Raad verkiesbaar is nie, maar sodanige Junior Lid kan aan die ander aktiwiteite van die Genootskap deelneem. Die ouers of voogde van 'n persoon wat aansoek om Junior Lidmaatskap doen moet die aansoekvorm onderteken en volle verantwoordelikheid vir die finansiële en ander verpligtinge namens sodanige Junior Lid aanvaar.

4.3 Maatskappy, Private Maatskappy, Vennootskap of Regspersoon

- 4.3.1 'n Maatskappy, private maatskappy, vennootskap of regspersoon wat om Gewone Lidmaatskap aansoek doen, moet aan die Genootskap sodanige feite en gegewens voorlê as wat nodig mag wees om die aard van die beherende aandeel daarin te bepaal en moet dan, of te eniger tyd daarna, benewens die vereiste gegewens wat van alle aansoekers verlang word, die Genootskap verder in kennis stel van die naam en adres van die persoon wat aangestel is om as verteenwoordiger by vergaderings van die Genootskap op te tree:

Op die verdere voorwaarde dat sodanig persoon die reg sal hê om skriftelik 'n plaasvervanger te benoem. Sodanige skriftelike benoeming moet die Genootskap nie later as voor die aanvang van die vergadering waarop sodanige plaasvervanger moet stem, bereik nie.

Ten opsigte van 'n vennootskap moet die volle name en adresse van alle vennote ten tyde van aansoek om lidmaatskap aan die Genootskap verstrek word en sulke vennote sal gesamentlik en afsonderlik vir alle verpligtinge teenoor die Genootskap verantwoordelik wees.

- 4.3.2 Alle stukke wat aan sodanige gevolmagtigde verteenwoordiger, soos in Klousule 4.3.1 uiteengesit, gerig is, word beskou as behoorlik op die maatskappy, private maatskappy, vennootskap of regspersoon bestel te wees en by alle vergaderings wat deur sodanige gevolmagtigde verteenwoordiger namens die maatskappy, private maatskappy, vennootskap of regspersoon bygewoon word, word die maatskappy, private maatskappy, vennootskap of regspersoon beskou as behoorlik verteenwoordig te wees.
- 4.3.3 Die persoon wat, soos in Klousule 4.3.1 uiteengesit, aangewys is om sodanige maatskappy, private maatskappy, vennootskap of regspersoon te verteenwoordig, mag tot die Raad verkies word.
- 4.3.4 Indien so 'n maatskappy, private maatskappy, vennootskap of regspersoon in gebreke bly om aan die vereistes van Gewone Lidmaatskap te voldoen, soos in Klousule 4.2 uiteengesit, sal sy lidmaatskap van die Genootskap beëindig word en die bepalinge van die volgende Klousule 4.3.5 sal *mutatis mutandis* op so 'n maatskappy, private maatskappy, vennootskap of regspersoon van toepassing wees.
- 4.3.5 In die geval van die likwidasië van 'n maatskappy of private maatskappy of die ontbinding van 'n vennootskap of regspersoon, sal lidmaatskap van die Genootskap outomaties beëindig word: Met dien verstande dat –
- 4.3.5.1 alle gelde of bedrae aan die Genootskap verskuldig op die datum van likwidasië of ontbinding deur die Genootskap van die likwidateur van sodanige maatskappy of private maatskappy of van die lede (hetsy gesamentlik of afsonderlik) van sodanige vennootskap of regspersoon gevorder sal word;
- 4.3.5.2 die likwidateur van sodanige maatskappy of private maatskappy en die lede van sodanige vennootskap of regspersoon verplig sal wees om al die verpligtinge van so 'n maatskappy, private maatskappy, vennootskap of regspersoon na te kom ten opsigte van aantekeninge, registrasies, oordragte of enige verpligtinge wat die maatskappy, private maatskappy, vennootskap of regspersoon as lid van die Genootskap moes nakom; en

- 4.3.5.3 enige gelde wat betaalbaar mag wees, soos kuddegelde, aantekeninge, registrasies, oordragte of ander verpligtinge wat na so 'n outomatiese beëindiging van lidmaatskap nagekom moet word, ooreenkomstig die skaal vir Gewone Lede of Lewenslange Lede opgelê sal word.

4.4 Buitelede

- 4.4.1 Enige persoon met inbegrip van 'n maatskappy, private maatskappy, vennootskap of regs persoon woonagtig in die Gebied buite Suid-Afrika wat belangstelling toon in die teel van diere en wie direk of indirek gemoeid is met die teel van diere, sal in aanmerking kom vir aanvaarding as 'n Geregistreerde Teler.

4.4.2 Regte en Voorregte van Buitelede

Al die regte en verpligtinge van lede sal *mutatis mutandis* van toepassing wees op alle Buitelede wie aansoek doen om by die Genootskap geregistreer te word of wie reeds voorheen by die Genootskap as Geregistreerde Telers geregistreer was. Buitelede is *ipso facto* aanspreeklik vir kostes aan die Vereniging.

4.5 Aansoek om Lidmaatskap

- 4.5.1 Aansoek om lidmaatskap van die Genootskap moet op die voorgeskrewe vorm (Bylae D) aan die Genootskap gerig word. Die aansoek moet ook vergesel gaan van die betrokke subskripsie en/of intreegeld soos uiteengesit in die Bylae van Gelde van die Genootskap. (Bylae A)
- 4.5.2 'n Aansoek om lidmaatskap moet vergesel gaan van die nodige bewys dat aan die bepaalde vereistes beantwoord word.
- 4.5.3 Die Raad mag die aansoek om lidmaatskap van enige persoon aanvaar, hetsy onvoorwaardelik of op sodanige voorwaardes as wat die Raad mag bepaal, of enige aansoek weier: Met dien verstande dat redes vir sodanige weiering verstrek sal word.
- 4.5.4 Indien 'n aansoek om lidmaatskap geweier is, sal die aansoeker geregtig wees op die terugbetaling van enige gelde wat sy aansoek vergesel het.

5. REGISTER VAN LEDE

- 5.1 Die Genootskap sal 'n register van alle lede hou waarin die datum van toelating tot lidmaatskap, hul posadres, bedrae van hul ontvang en die datum van betaling, agterstallige gelde, indien enige, wat verskuldig mag wees, asook die datum waarop die laaste diere in hul naam aangeteken of geregistreer is, ingeskryf moet word.
- 5.2 Elke lid moet die Genootskap skriftelik binne een maand van 'n verandering van sy posadres in kennis stel en alle kennisgewings of publikasies wat aan 'n lid se aangetekende adres gestuur is, sal beskou word as behoorlik op sodanige lid bestel te wees.
- 5.3 Alle stukke wat per aangetekende pos of e-pos deur die Genootskap aan lede versend is, sal as bindend beskou word.

6. REGTE EN VOORREGTE VAN LEDE

Uitgesluit eksekuteurs van afgestorwe boedels, kurators van insolvente boedels en likwi-dateurs van maatskappye of private maatskappye sal die regte en voorregte van elke lid van die Genootskap persoonlik op homself van toepassing wees en dit is nie oordraagbaar nie, hetsy deur sy eie handeling of deur enige wetsbepaling.

Regte van lede sal, onderworpe aan die voorskriftelike bepalings van Klousules 4 en 8.3, die volgende insluit –

- 6.1 om alle verslae en ander publikasies te ontvang wat deur die Genootskap vir verspreiding onder lede uitgegee word;
- 6.2 om alle algemene vergaderings van die Genootskap by te woon en om op sodanige vergaderings te stem;
- 6.3 om aansoek te doen om die aantekening en registrasie van diere in ooreenstemming met die bepalings van die Grondwet;
- 6.4 om, indien beskikbaar, alle deskundige tegniese advies met betrekking tot aangeleenthede rakende die ras van die Genootskap se keurders en amptenare te ontvang. Alle koste wat hieraan verbonde mag wees moet deur die aansoeker betaal word;
- 6.5 om die Genootskap se amptelike verslae te raadpleeg en te gebruik; en
- 6.6 om oor al die regte en voorregte en verpligtinge soos in die Grondwet uiteengesit, te beskik.

7. LEDEGELD EN GELDE

- 7.1 Alle ledegelde of enige ander gelde en kommissie aan die Genootskap betaalbaar, word van tyd tot tyd deur die Raad bepaal en word vir kennisname op die eerste daaropvolgende algemene vergadering van die Genootskap voorgelê.
- 7.2 Die jaarlikse ledegelde is vooruitbetaalbaar op 1 Julie van elke jaar en sal as agterstallig beskou word as dit nog nie op 1 November van dieselfde jaar betaal is nie.
- 7.3 Enige lid wie –
 - (a) se ledegeld agterstallig is; of
 - (b) wat ander gelde en kommissie aan die Genootskap skuld ten opsigte van enige gelde of verpligtinge vir meer as 30 dae nadat 'n eis om die betaling daarvan deur die Sekretaris aan hom gerig is, sal daarna geen regte en voorregte van lidmaatskap geniet voordat sodanige skulde aangesuiwer is nie.
- 7.4 Die Raad mag opdrag gee dat rente en/of boetes gehef word op alle agterstallige rekeninge teen 'n koers soos van tyd tot tyd deur die Raad bepaal mag word.
- 7.5 Enige lid wie, om watter rede ookal, ophou om 'n lid van die Genootskap te wees sal aanspreeklik bly vir alle bedrae wat ten tyde van die beëindiging van sy lidmaatskap deur hom aan die Genootskap verskuldig was.
- 7.6 Indien die Raad sou beslis dat die rekening van 'n lid agterstallig is of ten tyde van die beëindiging van sy lidmaatskap uitstaande is, sal so 'n lid, indien sy rekening vir invordering aan 'n firma van prokureurs oorhandig word, verantwoordelik gehou word vir die betaling van alle regskoste, invorderingsgelde, prokureursgelde en kliëntkoste wat dit mag meebring, tesame met die oorspronklike bedrag, boetes en eise wat deur hom aan die Genootskap verskuldig is.

8. BEDANKINGS, SKORSING EN OPHEFFING VAN STEMREG VAN LEDE

8.1 Bedanking van Lede

Enige lid mag bedank as lid van die Genootskap deur nie minder nie as drie maande voor die tyd skriftelik kennis daarvan aan die Genootskap te gee: Met dien verstande dat alle gelde aan die Genootskap verskuldig ten volle betaal is en die lid sy verpligtinge nagekom het ten opsigte van dokumente, rekords, aantekeninge, registrasies en oordragte of enige ander verpligting met betrekking tot sy lidmaatskap deur die Genootskap vereis.

8.2 Skorsing van Lede

8.2.1 Die Raad mag 'n lid skors wat –

- 8.2.1.1 In gebreke gebly het om enige bedrag wat deur hom aan die Genootskap verskuldig is te betaal binne 90 dae nadat 'n skriftelike eis vir sodanige ver-effening deur die

Sekretaris onderteken, aan hom gepos of ge-e-pos is;

- 8.2.1.2 die Grondwet of enige reël van die Genootskap oortree het of wat na oordeel van die Raad op enige wyse oneerbaar of afbrekend teenoor die karakter, of ten nadele van die belange van die Genootskap opgetree het;
- 8.2.1.3 deur sy optrede of gebrek daaraan werklike of moontlike oneer aan die Genootskap gebring het of wat skuldig was aan gedrag ten werklike of moontlike nadeel van die doelstellings van die Genootskap;
- 8.2.1.4 met opset of vir persoonlike gewin of voordeel foutiewe informasie aan die Genootskap of enige van sy amptenare of aan beamptes of beoordelaars by skoue verstrek het, of wat aan die liggaam van 'n dier sodanige veranderings aangebring het om enige persoon te mislei;
- 8.2.1.5 probeer om 'n amptenaar van die Genootskap om te koop; of
- 8.2.1.6 skuldig bevind is op grond van 'n oortreding van die Wet;

MET DIEN VERSTANDE DAT geen stappe vir skorsing geneem sal word teen 'n lid van die Genootskap nie, alvorens die Genootskap nie minstens 30 dae voor die datum van die Raadsvergadering waarop sodanige skorsing behandel sal word, 'n geregistreerde brief aan so 'n lid gerig het waarin hy in kennis gestel word van sy voorgestelde skorsing en waarin daar 'n beroep op hom gedoen word om persoonlik, of indien hy so verkies, deur sy behoorlik gemagtigde verteenwoordiger, sy kant van die saak op die Raadsvergadering te stel.

- 8.2.2 Die Raad of enige Komitee van die Raad sal geregtig wees om behoorlik navraag te doen in verband met die gedrag van 'n lid en om sodanige informasie by so 'n plek, persoon, firma en/of instansie in ontvangs te neem en daarop te handel op so 'n wyse as wat die Raad mag goeddink.
Die gewone reëls wat betref die lewering van getuienis sal nie van toepassing wees op sodanige *bona fide* navraag nie en geen lid sal enige aksie, eis en/of reg van verhaal teen die Raad of sy Komitee hê in verband met enige aangeleentheid en/of saak wat voortspruit uit sodanige navraag of informasie wat bekom was nie.
- 8.2.3 Enige lid wat geskors is, moet deur die Genootskap skriftelik daarvan in kennis gestel word binne drie dae na die datum waarop die besluit met betrekking tot sy uitsetting goedgekeur is.
- 8.2.4 Na sodanige skorsing van 'n lid mag die Raad opdrag aan die Sekretaris gee om sy naam uit die Kuddeboek en enige ander registers of verslae van die Genootskap te verwyder. Die Raad mag verder van die geskorste lid verlang om onverwyld alle aantekening- of registrasiesertifikate ten opsigte van perde wat ten tyde van sy skorsing in sy besit was, aan die Genootskap te oorhandig en na sodanige datum sal geen perde deur hom geteel, aangeteken of geregistreer word nie; geen geboortekennisgewing van hom ontvang sal aanvaar word nie en hy sal dienooreenkomstig in kennis gestel word.
- 8.2.5 Enige lid wat geskors word sal alle gelde deur hom aan die Genootskap verskuldig ten volle betaal en al sy verpligtinge nakom ten opsigte van aantekeninge en/of registrasies en oordragte of enige ander verpligtinge met betrekking tot sy lidmaatskap.
- 8.2.6 Enige persoon wat as lid van die Genootskap geskors word bly aanspreeklik vir alle ledegeld en gelde deur hom verskuldig aan die Genootskap ten tyde van sy skorsing.

8.3 Opheffing van Stemreg

- 8.3.1 Enige lid, uitgesonderd lede in Klousule 4.2.3 bedoel, wat vir 'n termyn soos wat die Raad van tyd tot tyd mag bepaal geen diere in sy naam laat aanteken of registreer het nie of wat nie aangetekende of geregistreerde diere gedurende sodanige tydperk aangekoop het waarvan die oordragte in sy naam geregistreer is nie, sal sy stemreg waarna in Klousule 6.2 verwys word, verbeur.

- 8.3.2 Die stemreg van geen lid sal opgehef word mits hy nie ten minste 30 dae voor die vergadering waarop sodanige opheffing in werking sal tree skriftelik daarvan deur die Sekretaris in kennis gestel is nie.
- 8.3.3 Sodanige opheffing van stemreg van 'n lid sal van krag bly totdat hy weer perde laat aanteken of registreer waarna die opheffing van sy stemreg onmiddellik beëindig sal word sonder dat enige kennisgewing te dien effekte aan hom gegee moet word.
- 8.3.4 Die opheffing van stemreg op die hierin vermelde wyse sal geensins die ander regte en/of verpligtinge van lidmaatskap affekteer nie.

9. HERAANSLUITING VAN LEDE

Enige persoon wat opgehou het om lid van die Genootskap te wees, mag weer vir lidmaatskap in aanmerking kom ooreenkomstig die bepalings van Klousule 4.5 en nadat alle agterstallige skulde vereffen is.

10. RAAD EN UITVOERENDE KOMITEE

10.1 Verkiesing van die Raad

Die belange van die Genootskap sal beheer en bestuur word deur 'n Raad wat uit die volgende ses lede sal bestaan en wat jaarliks tydens die Algemene Jaarvergadering of 'n spesiale algemene vergadering wat vir die doel belê is, verkies word.

10.1.1 Die Algemene Jaarvergadering sal die President en Vise-President kies, wat die amp vir 'n tydperk van twee jaar sal beklee.

10.1.2 Vier ander lede wie hul amp sal beklee tot die tweede Algemene Jaarvergadering na hul verkiesing wanneer twee lede deur die lot aangewys, sal aftree. Daarna by elke Algemene Jaarvergadering sal die twee lede wat die langste die amp beklee het, die amp neerlê.

10.1.3 Die President, Vise-President en uittredende lede is almal herkiesbaar.

10.1.4 By die verkiesing van Raadslede moet alle persone per geslote briefie genomineer word en per geslote stembriefie verkies word.

10.2 Addisionele Raadslede

Benewens die ses verkose lede van die Raad sal daar ook die volgende persone wees wat in 'n adviserende hoedanigheid op die Raad dien –

10.2.1 Die Registrateur van Diereverbetering

10.2.2 Ere-Lewenslange-Vise-Presidente

Vir uitsonderlike dienste aan die ras mag persone op aanbeveling van die Raad by 'n Algemene Jaarvergadering verkies word tot Ere-Lewenslange-Vise-President, wat *ex officio* lede van die Raad sal wees en oor stemreg sal beskik. Daar sal egter nooit meer as twee Ere-Lewenslange-Vise-Presidente gedurende dieselfde tyd wees nie.

10.2.3 Die Sekretaris

Die Sekretaris van die Genootskap wat alle vergaderings van die Genootskap sal bywoon en die reg het om aan besprekings deel te neem, maar egter nie stemreg sal hê oor enige probleem of beslissing wat by die vergadering geneem word.

10.2.4 Gekoöpteerde Lede

Enige persoon wie deur die Raad in 'n adviserende hoedanigheid aangestel of gekoöpteer word, asook persone wat op die Algemene Vergadering verkies word om 'n streek wat nie deur 'n Raadslid verteenwoordig is nie van 'n verteenwoordiger te voorsien. So 'n verteenwoordiger wat deur die Algemene Vergadering verkies is sal deur die Raad gekoöpteer word.

Gekoöpteerde lede sal egter nie stemreg hê oor enige probleem of beslissing wat by 'n Raadsvergadering geneem word nie. Streeksverteenwoordigers sal tot 'n maksimum van twee beperk word en vir 'n termyn van een jaar dien.

10.3 Uitvoerende Komitee

Die Uitvoerende Komitee van die Raad, wat magte sal beklee soos van tyd tot tyd deur die Raad bepaal, sal bestaan uit die President, Vise-President en een Raadslid wat deur die Raad verkies word. Alle verrigtinge of besluite van die Uitvoerende Komitee moet goedgekeur word op die daaropvolgende Raadsvergadering;

- 10.4 Indien 'n lid van die Raad te sterwe kom, bedank, ophou om lid van die Genootskap te wees of sy amp verbeur ingevolge Klousule 10.6 kan die Raad 'n ander lid van die Genootskap aanwys as sy plaasvervanger met volle magte vir die res van sy dienstermyn. Die Raad sal as behoorlik gekonstitueer beskou word en sal voortgaan om al die magte wat aan hom opgedra is uit te voer nieteenstaande enige vakatures wat daarin mag ontstaan.
- 10.5 In die geval waar die amp van President of Vise-President vakant raak voor die verstryking van die tydperk waarvoor hy tot die Raad verkies is, moet die Raad by sy daaropvolgende vergadering per geslote stembriefies persone uit sy geledere nomineer en een verkies om die vakature vir die onverstreke tydperk te vul.
- 10.6 Lede van die Raad wat van twee agtereenvolgende vergaderings van die Raad afwesig was sonder toestemming of grondige rede, sal hul amp verbeur.

11. MAGTE EN PLIGTE VAN DIE RAAD

Die Raad het, onderworpe aan die bepalings van die Grondwet en die besluit van die Genootskap soos van tyd tot tyd geneem word, die mag om sodanig op te tree as wat in belang van die Genootskap is, of vir die bevordering en volvoering van sy doelstellings wat nodig of wenslik geag mag word.

In besonder het die Raad die mag om –

- 11.1 betaling van lenings op enige wyse te sekureer, insluitende die verhipotekering of verpanding van goed, en sonder om afbreuk te doen aan die algemeenheid daarvan, in besonder deur die uitreiking van die soort skuldbrief of skuldbriefeffekte, met of sonder sekuriteit;
- 11.2 geld aan enige persoon of maatskappy te leen;
- 11.3 vrywaring en waarborge en borgstelling aan te gaan en betaling daar kragtens op enige wyse te sekureer;
- 11.4 donasies of skenkings te maak;
- 11.5 'n trust te onderneem en uit te voer;
- 11.6 gratifikasies en pensioene te betaal en pensioenskemas en ander aansporingskemas ten opsigte van sy ampsdraers en werknemers tot stand te bring;
- 11.7 onderhewig aan die bepalings van Klousule 7 die ledegelde of verpligtinge van lede van tyd tot tyd te wysig of aan te pas en om enige bykomende gelde en verpligtinge voor te skryf soos nodig geag mag word;
- 11.8 een of meer bankrekenings namens die Genootskap te open en enige wissel, skuldbewys, tjek of ander verhandelbare dokument wat op sake van die Genootskap betrekking het te trek, te aanvaar, te endosseer, aan te gaan of uit te voer;

- 11.9 geboue, grond, goedere, roerende bates en besittings te koop, te huur, op verband te neem of vir die Genootskap aan te skaf; om roerende goedere of vaste eiendom van die Genootskap te verkoop, te verpand, te verhuur, te vervreem of andersins daarvan ontslae te raak en die vergoeding daaruit verkry op so 'n wyse aan te wend as wat tot die grootste voordeel van die Genootskap gereken mag word;
- 11.10 enige gelde wat nie vir die onmiddellike behoeftes van die Genootskap nodig is nie te belê of op enige ander wyse te behartig teen sodanige sekuriteite en op sodanige voorwaardes soos die Raad mag goedvind en van tyd tot tyd enige sodanige beleggings te verander of te onttrek: Met dien verstande dat fondse beskikbaar vir belegging slegs belê mag word by geregistreerde finansiële instellings soos omskryf in Artikel 1 van die Wet op Finansiële Instellings (Belegging van Fondse), 1984, en in effekte genoteer op gelisensieerde effektebeurse soos omskryf in Artikel 1 van die Wet op Beheer van Effektebeurse, 1985 (Wet No 1 van 1985);
- 11.11 al die kostes en rekenings met betrekking tot die administrasie en bestuur van die Genootskap te betaal;
- 11.12 gelde, donasies en ander skulde en fondse in te samel en te ontvang en dit tot voordeel van die Genootskap en/of tot bevordering van die ras aan te wend;
- 11.13 op sekuriteit van enige eiendom van die Genootskap geld vir die Genootskap te leen;
- 11.14 ooreenkomstig Klousule 7.3 te weier om keuring-, aantekening-, registrasie- en ander werk vir lede te doen indien hulle uitstaande skuld by die Genootskap het;
- 11.15 algemene vergaderings van die Genootskap te belê, òf na aanleiding van 'n spesiale versoek daartoe wat volgens die bepalings van die Grondwet gerig is, òf andersins indien dit noodsaaklik geag word;
- 11.16 na goeëddunke sodanige ouditeure, prokureurs of ander regsvertegenwoordigers, agente, ampsdraers of amptenare of ander werknemers permanent, tydelik of met die oog op spesiale dienste aan te stel, te ontslaan, of te skors; om hul magte en pligte te bepaal, hul vergoeding en diensvoorwaardes vas te stel en om sodanige voorsorg te tref vir die behoorlike uitvoering van hul pligte, as wat in besondere gevalle raadsaam geag mag word;
- 11.17 'n geding in te stel, te voer, te laat voer, te verdedig, of 'n skikking aan te gaan ten opsigte van enige geregtelike stappe deur of teen die Genootskap of teen enige van sy ampsdraers of amptenare of ander werknemers in verband met die aangeleentheid van die Genootskap; en om enige skulde wat betaalbaar is te verminder, of uitstel te verleen vir die afbetaling daarvan of die voldoening aan enige eise of aanskrywing deur of teen die Genootskap;
- 11.18 Enige skulde wat betaalbaar is te verminder, of uitstel te verleen vir die afbetaling daarvan of die voldoening aan enige eise of aanskrywing deur of teen die Genootskap;
- 11.19 kontrakte buite Suid-Afrika aan te gaan en kontrakte, aktes en dokumente in 'n vreemde land te verkry;
- 11.20 keurders aan te stel om diere wat vir aantekening of registrasie aangebied is, te keur en vir die doel van enige ander werksaamhede waarvoor lede van die Genootskap die dienste van keurders mag verlang en om aan sodanige keurders opdragte te gee en magte te verleen met betrekking tot hul pligte om te verseker dat die doelstellings van die Genootskap uitgevoer word, of om hulle te ontslaan;
- 11.21 opdrag te gee aan keurders en/of ander amptenare van die Genootskap om ondersoek in te stel

na gevalle waar daar nie behoorlik rekords gehou word nie of waar daar twyfel mag ontstaan met betrekking tot die identiteit van 'n diere en om sodanige stappe te neem soos in die belang van die Genootskap wenslik geag mag word;

- 11.22 die dienste van enige persoon of lid van die Genootskap te koöpteer en om subkomitees te benoem op sodanige voorwaardes en sodanige magte aan hul te verleen as wat van tyd tot tyd wenslik geag mag word. Die President en Vise-President van die Genootskap is *ex officio* lede van alle subkomitees met alle regte en voorregte. Addisionele lede mag op die Raad koöpteer word, maar sulke gekoöpteerde lede sal nie stemreg op die Raad hê nie;
- 11.23 sodanige reëls en voorwaardes op te stel met betrekking tot die kwalifikasies en benoeming van beoordelaars van die ras as wat nodig geag mag word: Met dien verstande dat geen persoon as beoordelaar van die ras aangestel sal word alvorens hy voldoen aan sodanige vereistes as wat deur die Raad bepaal mag word nie. Verder om van tyd tot tyd die paneel van beoordelaars in heroorweging te neem en om daaruit sodanige name te verwyder as wat nodig geag mag word;
- 11.24 'n sisteem van beoordeling en keuring ten opsigte van die keuring van diere in te stel en om reëls, voorwaardes, en terme aangaande sodanige keuring te formuleer: Met dien verstande dat wanneer die Raad enige sodanige reëls òf herroep òf op enige ander wyse verander het, sodanige reëls by die eersvolgende algemene vergadering van die Genootskap vir die inligting van sodanige vergadering voorgelê moet word;
- 11.25 verkope van diere te organiseer en te bevorder, hetsy deur openbare veilings of uit die hand en om vir hierdie doel afslaaers en agente aan te stel;
- 11.26 aan enige lid van die Raad of enige amptenaar of werknemer van die Genootskap verlof tot afwesigheid toe te staan vir enige tydperk en op sodanige voorwaardes as wat in elke geval bepaal mag word;
- 11.27 een of meer lede of amptenare aan te stel met die gesag om namens die Genootskap dokumente te onderteken, stukke en gegewens te ontvang, geregtelike stappe te doen, op te tree, 'n eis in te stel, of gedagvaar te word, sodat die sake van die Genootskap beter en gemakliker uitgevoer en afgehandel kan word;
- 11.28 verteenwoordiger/s ooreenkomstig Klousule 16 op die Algemene Jaarvergadering van die Vereniging aan te stel en om 'n persoon of persone te benoem om die Genootskap op enige komitee, liggaam of organisasie te verteenwoordig;
- 11.29 aansoeke om lidmaatskap te ontvang en te oorweeg en dit na eie oordeel te aanvaar of af te wys;
- 11.30 reëls en regulasies met betrekking tot die beheer van sake en die uitvoer van die doelstellings van die Genootskap op te stel, te wysig of op te hef;
- 11.31 ooreenkomstig Klousule 8 die lidmaatskap van enige persoon te beëindig;
- 11.32 sodanige strawwe of boetes op te lê of af te dwing as wat van tyd tot tyd vir lede van die Genootskap bepaal mag word vir die oortreding of skending van die Grondwet, reëls en regulasies van die Genootskap;
- 11.33 ondersoek in te stel na geskille wat uit die toepassing van die Grondwet mag ontstaan en om uitsluitel daaromtrent te gee;
- 11.34 enige bylae wat by die Grondwet aangeheg is, te verander of te wysig soos van tyd tot tyd nodig geag mag word;

11.35 'n Standaard van Voortreflikheid op te stel en minimum vereistes en ander standarde neer te lê waarvolgens –

11.35.1 diere deur keurders geïnspekteer word met die oog op aantekening of registrasie; en
11.35.2 onderworpe aan die bepalings van die Wet, aansoeke vir die in- en uitvoer van diere, semen en embrio's oorweeg word;

11.36 van tyd tot tyd die Standaard van Voortreflikheid te hersien en aanbevelings aan die Algemene Jaarvergadering te maak; en

11.37 in die algemeen alles wat nodig is te doen met die oog op die welvaart van die Genootskap en die hantering van sy sake, altyd op voorwaarde dat enige stappe wat gedoen word of opdragte wat gegee word, nie teenstrydig sal wees met die bepalings van die Wet en die Grondwet nie.

12. VERGADERINGS

12.1 Vergaderings van die Uitvoerende Komitee

Die Uitvoerende Komitee sal wanneer nodig vergader om die pligte wat deur die Raad aan hom opgedra is, uit te voer.

12.1.1 'n Raadslid mag die President verlof vra om persoonlik enige sake van belang voor die Uitvoerende Komitee te lê: Op voorwaarde dat hy volledig op skrif stel wat die aard van die saak is. Indien die Voorsitter besluit dat die saak van genoegsame belang en dringendheid is, mag hy verlof verleen dat so 'n Raadslid die Uitvoerende Komiteevergadering bywoon om, met toestemming van die Komitee, die vergadering toe te spreek.

12.1.2 Indien die Voorsitter nie die saak van genoegsame belang ag nie mag hy verlof tot bywoning weier en indien hy so oordeel, toesien dat die aangeleentheid op die agenda geplaas word.

12.2 Raadsvergaderings

12.2.1 Die Raad sal op sodanige tyd, plek en manier vergader soos van tyd tot tyd bepaal, of soos die President, of in sy afwesigheid die Vise-President, mag besluit: Raadsvergaderings wat deur middel van 'n telefoonkonferensie plaasvind sal beskou word as plaasgevind in ooreenstemming met die bepalings van die Grondwet. Minstens drie Raadsvergaderings moet gedurende elke finansiële jaar gehou word.

12.2.2 'n Spesiale Raadsvergadering –

12.2.2.1 mag deur die President (of in sy afwesigheid deur die Vise-President) belê word, op sodanige tyd, plek of manier as wat sodanige ampsbekleër mag besluit; of

12.2.2.2 sal belê word op grond van 'n aansoek onderteken deur nie minder nie as vier Raadslede waarin die redes vir die vergadering gemeld word. Sodanige aansoek moet aan die Sekretaris gerig word.

12.2.3 Skriftelike kennisgewing van die tyd, datum, plek of manier van 'n voorgenome Raadsvergadering moet nie minder nie as 14 dae voor die vergadering sal plaasvind, deur die Sekretaris aan elke lid van die Raad gepos of ge-e-pos word.

12.3 Algemene Vergaderings

12.3.1 'n Algemene vergadering van die Genootskap wat bekend staan as die Algemene Jaarvergadering word een keer in 'n finansiële jaar gehou op so 'n tyd en plek as wat die Raad mag bepaal, maar nie later nie as ses maande na die einde van elke finansiële jaar van die Genootskap.

12.3.2 By so 'n Algemene Jaarvergadering sal die Raad sy jaarverslag aan die Genootskap voorlê, tesame met 'n behoorlike geouditeerde balansstaat en 'n verslag van die finansiële jaar waarop die verslag betrekking het. Sodanige Algemene Jaarvergadering moet gehou word –

12.3.2.1 nie later nie as ses maande na die einde van elke finansiële jaar van die Genootskap (30 Junie van elke jaar); en

12.3.2.2 binne hoogstens 15 maande na die datum van die jongste vooraf-gaande Algemene Jaarvergadering van die Genootskap.

12.3.3 'n Spesiale Algemene Vergadering van die Genootskap mag te eniger tyd belê word deur –

12.3.3.1 die Raad; of

12.3.3.2 die President (of in sy afwesigheid die Vise-President) en sal in laasgenoemde geval belê word op grond van 'n skriftelike aansoek daartoe, wat aan die Sekretaris gerig is en wat deur nie minder nie as tien lede van die Genootskap onderteken is. So 'n aansoek moet die doelstellings van die vergadering duidelik uiteensit en gedurende sodanige vergadering mag slegs die gemelde sake behandel word.

12.3.4 'n Voorlopige kennisgewing van die tyd, datum en plek van 'n Algemene Jaarvergadering moet minstens 60 dae voor die vergadering deur die Sekretaris aan elke lid gepos of per e-pos uitgestuur word. Enige lid wat van plan is om enige saak by die Algemene Jaarvergadering vir bespreking voor te lê, moet die Sekretaris nie minder nie as 40 dae voor die vergadering, skriftelik daarvan in kennis stel.

12.3.5 'n Finale kennisgewing van die tyd, datum en plek waarop enige algemene vergadering gehou sal word, tesame met die agenda vir die vergadering, moet minstens 30 dae voor die vergadering aan elke lid van die Genootskap gepos of per e-pos uitgestuur word.

12.3.6 Daar sal geen saak op enige Algemene Vergadering ter tafel geneem word tensy kennis daarvan op die agenda, wat tesame met die kennisgewing van vergadering aan lede gestuur is verskyn nie, of tensy so 'n vergadering met 'n twee-derde meerderheid van stemme, van lede wat teenwoordig en stemgeregtig is, besluit om enige saak wat nie spesifiek op die agenda is nie, te bespreek en daaroor te stem, ongeag die bepaling van Klousule 12.3.3.2.

12.3.7 Enige Algemene Vergadering mag verdaag word deur 'n twee-derde meerderheidstem van die lede wat daarby teenwoordig is.

12.3.8 Vir die doel om besluite op 'n Algemene Jaarvergadering geneem, te herroep, word 'n tweede meerderheid op 'n algemene vergadering vereis.

12.4 Voorsitter by Vergaderings

Die President beklee die voorsitterstoel by alle vergaderings en indien hy afwesig is beklee die Vise-President die amp. Indien daar nie een van hierdie ampsdraers by 'n vergadering teenwoordig is nie, mag die lede wat teenwoordig is 'n ander lid verkies om by sodanige vergadering die voorsitterstoel te beklee en enige persoon wat op so 'n manier verkies is, sal met betrekking tot daardie vergadering oor die mag beskik om al die pligte van die President uit te voer.

12.5 Neem van Besluite

Alle sake wat voor enige vergadering gelê word, tensy andersins voorsien word, moet besleg word deur die meerderheid van stemme van die lede wat by die vergadering teenwoordig is en stemgeregtig is en in die geval van 'n staking van stemme sal die persoon wat by daardie vergadering die voorsitterstoel inneem 'n beslissende stem naas sy gewone stem hê.

12.6 Metode van Stemming

Onderworpe aan die bepalings van Klousule 10.3 sal stemming by alle vergaderings met die opsteek van hande geskied, tensy enige teenwoordige lid stemming per briefies verlang in welke geval stemming per geslote stembriefies sal geskied.

12.7 Ongeldigheid van Besluite

Geen saak wat behoorlik en grondwetlik op enige vergadering afgehandel is, kan ongeldig verklaar word slegs weens die feit dat enige lid geen kennisgewing kragtens die vereistes van die Grondwet ontvang het nie.

12.8 Kworums

12.8.1 15% van die lede van die Genootskap wat persoonlik teenwoordig is by die aanvang van enige algemene vergadering sal 'n kworum vorm vir so 'n vergadering.

12.8.2 Vier Raadslede wat persoonlik teenwoordig is by enige Raadsvergadering en wat stemgeregtig is sal 'n kworum vorm vir so 'n Raadsvergadering.

12.8.3 Twee lede wat persoonlik teenwoordig is by enige Uitvoerende Komiteevergadering sal 'n kworum vorm vir sodanige Uitvoerende Komiteevergadering.

12.8.4 Indien daar by enige vergadering nie 'n kworum teenwoordig is nie kan die vergadering verdaag tot 'n tyd (nie minder nie as 14 dae daarna) en plek wat deur die lede persoonlik teenwoordig bepaal word. Op so 'n uitgestelde vergadering vorm die teenwoordige lede wel 'n kworum: Met dien verstande dat enige vergadering waar daar geen kworum is nie, maar waar die President of Vise-President teenwoordig is, vir 'n halfuur verdaag moet word waarna die lede wat dan teenwoordig is, 'n kworum vorm vir die afhandeling van sodanige sake (behalwe grondwetlike wysigings) as wat deur die lid wat die voorsitterstoel beklee, dringend mag verklaar. Sodanige verdaging vir 'n halfuur sal nie tot nadeel van die regte van die vergadering wees nie om nadat aandag aan die noodsaaklike aangeleenthede gegee is, te verdaag tot 'n tyd en plek soos hierin bepaal.

13. NOTULES VAN VERGADERINGS

13.1 'n Afskrif van die notules van alle algemene vergaderings sal aan elke lid van die Genootskap voorsien word. Afskrifte van die notules van Raadsvergaderings en Subkomitee vergaderings sal aan alle Raadslede voorsien word.

13.2 Die notule van alle vergaderings geteken deur die President of 'n persoon wie die voorsit-terstoel beklee gedurende die daaropvolgende vergadering, sal bewys wees daarvan dat alle verrigtinge behoorlik geskied het en dat alle verkiesings, aanstellings en besluite aanvaar gedurende sodanige vergadering, bindend en van krag is.

14. FINANSIËLE BEPALINGS

14.1 Die Raad sal een of meer bankrekenings namens die Genootskap open, waarin alle gelde wat die Genootskap ookal mag ontvang, gedeponeer moet word.

14.2 Alle betalings uit die fondse van die Genootskap word per Internet betaling (EFT) gedoen deur die Sekretaris of 'n persoon wat deur die Raad daartoe aangestel is, geteken en mede-onderteken word, deur sodanige persoon of persone as wat deur die Raad daartoe gemagtig is, ooreenkomstig Klousule 11.27: Op voorwaarde dat niks wat hierin vervat is die Raad sal verhoed om 'n kleinkas fonds in stand te hou en te beheer nie. Ook kan sodanige gereelde en gewone maandelikse rekenings wat nie 'n bedrag wat deur die Raad bepaal is, oorskry nie, kontant betaal word: Op voorwaarde dat die totale bedrag wat nodig is vir die betaling van sodanige rekenings per tjek getrek word.

- 14.3 Die Genootskap moet behoorlike rekeningboeke hou wat van tyd tot tyd maar nie minder nie as een keer per jaar deur 'n ouditeur of rekenmeester wat deur die Algemene Jaarvergadering van die Genootskap daartoe aangestel is, geouditeer word en 'n behoorlik geouditeerde balansstaat en verslag van die finansies van die Genootskap soos op 30 Junie van die finansiële jaar waarop die verslag betrekking het, soos uiteengesit in Klousule 12.3.2, moet aan die Algemene Jaarvergadering van die Genootskap voorgelê word.
- 14.4 Al die besittings van die Genootskap is gevestig in die Raad.
- 14.5 Die inkomste en besittings van die Genootskap, uit watter bron ookal ontvang, insluitende profyte en winste, sal enkel en alleen aangewend word ter bevordering van die doelstellings van die Genootskap en geen deel daarvan sal direk of indirek as dividend of bonus of andersins betaal of oorgedra word aan enige persone wat te eniger tyd lede van die Genootskap is of was nie: Op voorwaarde dat niks wat hierin vervat is die betaling in goeder trou aan enige werknemer of ander persoon vir dienste wat aan die Genootskap gelewer is, kan verhoed nie.
- 14.6 Die finansiële jaar van die Genootskap neem 'n aanvang op 1 Julie van elke jaar en sluit op 30 Junie van die daaropvolgende jaar.

15. LIDMAATSKAP VAN DIE VERENIGING EN AFFILIASIE

Die Genootskap sal sy lidmaatskap van die Vereniging in stand hou op die voorwaardes soos deur die Vereniging bepaal. Verder kan die Genootskap ook met enige vereniging, genootskap of organisasie waarvan die doelstellings met dié van die Genootskap ooreenstem, affilieer of inkorporeer op voorwaarde dat so 'n besluit goedgekeur word deur minstens twee-derdes van die stemgeregtigde lede wat by enige algemene vergadering van die Genootskap persoonlik teenwoordig is en stem.

16. VERKIESING VAN VERTEENWOORDIGER/S TOT DIE ALGEMENE JAARVERGADERING VAN DIE VERENIGING

Ooreenkomstig Klousule 11.28 moet die Raad 'n verteenwoordiger of verteenwoordigers tot die Algemene Jaarvergadering van die Vereniging verkies.

17. GRONDWETLIKE WYSIGINGS

- 17.1 Byvoegings tot, of wysigings of veranderings van die Grondwet mag slegs aangebring word deur 'n meerderheidsbesluit van nie minder nie as twee-derdes van die lede wat by 'n algemene vergadering van die Genootskap teenwoordig en stemgeregtig is en stem. Ook moet van die voorgestelde wysigings of byvoegings van die Grondwet, asook van die vergadering, skriftelik kennis gegee word aan elke lid van die Genootskap nie minder nie as 30 dae voor die vergadering.
- 17.2 Sodanige byvoeging tot, of wysiging van die Grondwet wat goedgekeur is soos in Klousule 17.1 hiervan beskryf, moet binne 30 dae nadat die wysiging aangebring is aan die Vereniging en die Registrateur voorgelê word en dit sal 30 dae nadat dit aldus voorgelê is, in werking tree: Met dien verstande dat indien die Registrateur enige tyd binne hierdie 30 dae periode die Vereniging en die Genootskap in kennis stel dat hy van mening is dat die byvoeging en wysiging onbestaanbaar is met die bepalinge van die Wet sodanige byvoeging en wysiging van nul en gener waarde sal word.
- 17.3 Enige wysiging van die Grondwet moet deur die Genootskap aan die Kommissaris van die Suid-Afrikaanse Inkomstediens voorgelê word.

18. KANTOOR VAN DIE GENOOTSAP

Die kantoor van die Genootskap sal op 'n plek wees soos wat die Raad mag bepaal.

19. ONTBINDING OF LIKWIDASIE VAN DIE GENOOTSKAP

Indien daar by die beëindiging of ontbinding van die Genootskap, na vereffening van alle skulde en aanspreeklikhede, enige bates van watter aard ookal oorbly sal sodanige bates nie tussen die lede van die Genootskap verdeel of aan hulle uitbetaal word nie, maar geskenk of oorgedra word aan sodanige ander instelling of instellings waarvan die doelstellings met dié van die Genootskap ooreenstem soos deur die meerderheid van lede op 'n algemene vergadering van die Genootskap besluit en wat opsigself vrygestel is van die betaling van inkomstebelasting kragtens Artikel 10(1)(cA)(i) van die Inkomstebelastingwet.

20. OORDRAG VAN BEVOEGDHEDE

Ondanks enige bepalings in die Grondwet strydig hiermee, mag enige lid deur 'n volmag prokurasie, behoorlik uitgereik en deur die Sekretaris geliasseer, 'n ander persoon volmag gee om namens hom geboortekennisgewings, aansoekvorms om aantekening, registrasie of oordrag, oordragsertifikate, dekkingsertifikate, opgawes of verslae of enige ander dokument met betrekking tot die administrasie van 'n stoet te onderteken en enige sodanige handtekening deur so 'n ten volle gemagtigde persoon sal deur die Genootskap as net so geldig en bindend aanvaar word asof dit die lid se eie handtekening is: Op voorwaarde dat niks wat hierin vervat is, so 'n gevolmagtigde persoon daartoe in staat sal stel om op enige moontlike manier deel te neem aan die nominering van die stemming vir enige raadslid, of oor enige aangeleentheid waaroor sy prinsipaal stemreg het, of om enige vergadering namens sy prinsipaal by te woon nie.

21. NIE-LEDE

Sodanige voordele van lidmaatskap as wat die Raad mag bepaal, mag aan nie-lede verleen word: Met dien verstande dat geen wetlike of ander verpligting op die Genootskap sal rus ten opsigte van sodanige nie-lede nie en op verdere voorwaarde dat alle gelde met betrekking tot enige dienste wat deur die Genootskap aan nie-lede gelewer word, sal wees soos in Bylae A uiteengesit. Sodanige gelde sal voortuibetalbaar wees.

22. OUTENTIEKE LESING VAN HIERDIE GRONDWET

Aangesien hierdie Grondwet en die bygaande Bylaes in Afrikaans opgestel, ingedien en oorweeg is, word die Afrikaanse weergawe as outentiek beskou.

23. PLIGTE VAN STREEKSVERTEENWOORDIGERS

- 23.1 Dat hulle moet kontak maak met lede en telers in hul streek, streekbelange op die hard dra en die doelstellings, belange en visie van die Miniatuurperd in die streek sal bevorder.
- 23.2 Dat daar terugvoering aan die Raad oor streeksake gegee sal word en ook aan die lede en telers in die streek terugvoering vanaf die Raad en Genootskap sal gee.
- 23.3 Dat streekbyeenkomste en/of klubs sover moontlik gefasiliteer en bevorder word.
- 23.4 Dat die belange van die Miniatuurperd en sy Genootskap altyd eerste gestel moet word.

ALGEMENE VERORDENINGE

1. KUDDEBOEK

1.1 Algemeen

- 1.1.1 Die Kuddeboek wat bekend sal staan as die S A Miniatuurperd-kuddeboek sal bestaan uit die volgende afdelings –
- (a) Basis Afdeling;
 - (b) Hulpstamboek Afdeling; en
 - (c) Volgeregistreerde Afdeling van die Kuddeboek.
- 1.1.2 Die Genootskap mag met goedkeuring en onder beheer van die Vereniging 'n Kuddeboek publiseer waarin die aantekeninge en registrasies wat onderhewig aan hierdie Verordening uitgevoer is, verskyn.

1.2 Basis Afdeling

- 1.2.1 Enige reu meer as 90 maar tot en met 100 sentimeter hoog, asook merries 95 tot en met 100 sentimeter hoog wat ouer as 2½ jaar is, en wat voldoen aan die minimum rasstandaard en wat vir die Raad aanvaarbaar is, sal op aansoek van die teler geskik wees vir aantekening as 'n Basis-dier in die Basis Afdeling van die Kuddeboek.
- 1.2.2 Alle diere waarvan die teelt- en ander besonderhede vir die Raad aanvaarbaar is, maar wat tydens die aanvanklike inspeksie jonger as 2½ jaar is, sal by opname as PEN-diere in die Basis Afdeling aangeteken word met die rede NI (Not Inspected). Sodra die diere weer op of na 2½ jaar ouderdom geïnspekteer is en aan al die minimum rasstandaarde voldoen, sal hierdie diere in die toepaslike afdeling van die Kuddeboek aangeteken word.

1.3 Hulpstamboek Afdeling

1.3.1 Hulpstamboek A

- 1.3.1.1 Reunperde tot en met 100 sentimeter hoog en hingste en merries tot en met 95 sentimeter hoog wat ouer as 2½ jaar is, wat voldoen aan die minimum rasstandaard en wat vir die Raad aanvaarbaar is, sal op aansoek van die teler geskik wees vir registrasie as 'n Hulpstamboek A dier in die Hulpstamboek Afdeling.
- 1.3.1.2 Manlike en vroulike nageslag van Basis merries en Hulpstamboek A, B of Volgeregistreerde hingste, tot en met 95 sentimeter hoog wat ouer as 2½ jaar is, wat voldoen aan die minimum rasstandaard en wat vir die Raad aanvaarbaar is, sal op aansoek van die teler geskik wees vir registrasie as 'n Hulpstamboek A dier in die Hulpstamboek Afdeling.
- 1.3.1.3 Hulpstamboek A afdeling word vanaf 1 Julie 2017 gesluit vir die opname en registrasie van nuwe hingste. In uitsonderlike gevalle waar 'n dier geïdentifiseer mag word wat aan al die standarde soos voorgeskryf deur die Raad voldoen, mag toestemming gegun word vir die aanvaarding van so 'n hings as Hulpstamboek A.
- 1.3.1.4 Hulpstamboek A afdeling word vanaf 1 Julie 2020 gesluit vir die opname en registrasie van nuwe merries. In uitsonderlike gevalle waar 'n dier geïdentifiseer mag word wat aan al die standarde soos voorgeskryf deur die Raad voldoen, mag toestemming gegun word vir die aanvaarding van so 'n merrie as Hulpstamboek A.

1.3.2 Hulpstamboek B

- 1.3.2.1 Die nageslag uit parings van Hulpstamboek A diere met Hulpstamboek A, B of Volgeregistreerde diere ouer as 2½ jaar en wat voldoen aan die minimum rasstandaarde, asook aan al die vereistes met betrekking tot registrasie, sal in

aanmerking kom vir registrasie in die Hulpstamboek B afdeling van die Kuddeboek.

1.4 Volgeregistreerde Afdeling

Die nageslag uit parings van Hulpstamboek B of Volgeregistreerde diere met Hulpstamboek B of Volgeregistreerde diere ouers as 2½ jaar en voldoen aan die minimum rasstandaarde, asook aan al die vereistes met betrekking tot registrasie, sal in aanmerking kom vir registrasie in die Volgeregistreerde Afdeling van die Kuddeboek.

2. VOORVOEGSEL EN KUDDEKENMERKLETTER

- 2.1 Diere sal nie vir aantekening of registrasie aanvaar word tensy die Genootskap voor die tyd, namens die teler vir sy uitsluitlike gebruik 'n voorvoegsel deur die Vereniging registreer het by die Organisasie deur die Departement aangestel om die Intergis te bestuur. Die teler sal sodanige voorvoegsel gebruik om alle diere deur hom geteel wat aangeteken of geregistreer word, te identifiseer.
- 2.2 Aansoek om registrasie van sodanige voorvoegsel deur die Vereniging word by die Genootskap gedoen en moet vergesel gaan van sodanige registrasiegelde as wat van tyd tot tyd deur die Raad voorgeskryf mag word.
- 2.3 Die oordrag van 'n voorvoegsel van een teler na 'n ander sal nie toegelaat word nie behalwe onder sodanige omstandighede en aan sodanige persone as waarvoor in die algemene verordeninge van die konstitusie van die Vereniging voorsiening gemaak word.
- 2.4 Die kuddekenmerkletters sal deur die Genootskap toegeken word aan telers namate hulle aansoek doen. Telers het egter die reg om kuddekenmerkletters te behou wat aan hulle toegeken is voor die goedkeuring van hierdie Grondwet indien deur die Genootskap sodanig goedgekeur.

3. IDENTIFIKASIE

Totdat DNS-toetse verpligtend word is die Genootskap se amptelike stelsel van permanente identifikasie van perde wat vir aantekening of registrasie in die Kuddeboek in aanmerking kom, 'n kleurfoto. Indien daar twyfel bestaan oor 'n perd se identiteit sal daar aangedring word op DNS-toetse.

4. NAME

- 4.1 Geen dier sal in aanmerking kom vir inskrywing in die Kuddeboek nie tensy dit duidelik gemerk en uitdruklik van 'n naam of nommer, wat die naam verteenwoordig, voorsien is. Die laaste gedeelte van die naam mag nie gedupliseer word nie. Die Raad het die reg om enige aansoek ten opsigte van 'n dier wat na sy oordeel nie duidelik gemerk is nie, of 'n misleidende naam het, te weier.

Beide hingste en merries moet DNS getipeer wees om hul vullens in die Vulboek te laat aanteken.

- 4.1.1 Die DNS van hingste is verpligtend vanaf 1 Januarie 2012.
- 4.1.2 Die DNS van merries is verpligtend vanaf 1 Januarie 2014.
- 4.1.3 Ouerskapverifikasie van alle vullens, is verpligtend.

- 4.2 Geen naam, insluitende die voorvoegsel, mag 30 spasies oorskry nie.
- 4.3 Indien die naam van 'n dier eers aangeteken of geregistreer is, kan dit daarna nie weer ge-wysig of verander word nie, tensy die naam 'n ooglopende fout openbaar, in welke geval die naam dan net op so 'n manier verander sal word as wat nodig is om die fout te herstel.

5. KENNISGEWING VAN GEBOORTES

- 5.1 Die teler van 'n vul van 'n aangetekende of geregistreerde merrie, of 'n merrie wat vir aantekening of registrasie in aanmerking kom, moet die Genootskap van die geboorte van die vul in kennis stel, ongeag of so 'n vul lewend of dood gebore is, raseg of 'n kruising is, of vir aantekening of registrasie

behou word, al dan nie.

- 5.2 Kennisgewings van elke geboorte moet op die voorgeskrewe geboortekennisgewingvorm geskied, in alle opsigte behoorlik voltooi en deur die teler onderteken en nie later nie as 6 maande na die geboortedatum van die betrokke vul aan die Sekretaris gestuur word vir indiening by die Vereniging. Geboortes mag ook elektronies gedoen word, in alle opsigte met alle dokumentasie soos verlang aangeheg.
- 5.3 Kennisgewing van geboortes wat meer as 240 dae (8 maande) na die geboorte van 'n vul deur die Sekretaris ontvang word, sal slegs aanvaar word onderhewig aan die goedkeuring van die Raad en aan die betaling van 'n boete soos wat die Raad van tyd tot tyd mag bepaal.
- 5.4 In die geval van veelvoudige geboortes moet die teler benewens die gegewens wat gewoonlik verlang word ook op die geboortekennisgewingvorm van elke vul die naam en geslag van die ander vul of vullens aandui.
- 5.5 Wanneer 'n teler kennis van geboorte van 'n vul gee moet die afskrif van sodanige vorm so voltooi word dat die inligting wat daarop verskyn in alle opsigte ooreenstem met die gegewens op die oorspronklike vorm of vorms wat aan die Sekretaris gestuur is. Noukeurige boekhouding van datum asook die verwysingsnommer soos verskaf moet van alle elektroniese geboortekennisgewings gehou word. Al die afskrifte moet deur die teler bewaar word op so 'n manier dat dit te alle redelike tye beskikbaar is vir insae en kontrolering.
- 5.6 Op ontvangs van 'n geldige vereiste kennisgewing van geboorte van 'n vul, hetsy lewendig of dood, moet die geboortekennisgewing nagegaan word en die besonderhede ingeskryf word in die boeke van die Genootskap en ontvangs daarvan aan die teler erken word.
- 5.7 Die Raad sal toesien dat daar namens elke teler rekords gehou word van alle geboortes van vullens (hetsy lewendig of doodgebore) waarvan die teler die Sekretaris behoorlik in kennis gestel het en ook van sodanige ander besonderhede as wat nodig geag mag word.
- 5.8 Diere ten opsigte waarvan geboortekennisgewings ontvang en in orde gevind is, word in die Vulboek ingeskryf en sal daarin bly totdat dit aanvaar word vir aantekening of registrasie, of afgekeur of gekanselleer word.

6. DIE GESAMENTLIKE BESIT VAN HINGSTE

- 6.1 Wanneer 'n hings oorgedra word aan gesamentlike eienaars, moet die volle naam en adres van elke mede-eenaar op rekord wees by die Genootskap en die Vereniging.
- 6.2 Die mede-eienaars en gebruikers van 'n hings is onderworpe aan die bepalings van die Wet.

7. DRAGTIGHEIDS- EN INTERVULLINGSPERIODE

Die dragtigheidsperiode wat ten opsigte van die ras erken word, is ongeveer 334 dae. Die minimum dragtigheidsperiode is 299 dae en die maksimum 367 dae. Geen dragtigheids-periode buite hierdie tydsbestek sal sonder spesiale goedkeuring van die Raad erken word nie tensy ouerskap deur DNS bevestig word. Die minimum aanvaarbare periode tussen die geboortedatums van twee agtereenvolgende vullens uit een merrie is 315 dae.

8. VEREISTES VIR AANTEKENING EN REGISTRASIE

- 8.1 Geen Suid-Afrikaansgeteelde Miniatuurperd sal vir aantekening of registrasie oorweeg word nie, tensy behoorlik kennis van geboorte ingedien was en beide ouers van sodanige dier by die Vereniging aangeteken of geregistreer is.
- 8.2 Inspeksie is 'n voorvereiste vir registrasie en behalwe deur spesiale goedkeuring van die Raad, sal geen dier onder die ouderdom van 2½ jaar vir aantekening of registrasie goedgekeur word nie. Alle

geregistreeerde diere is verder onderworpe aan 'n finale keuring op die ouderdom van 5 jaar. Hingste oor 95cm by keuring op 5 jaar mag nie vir teling gebruik word nie.

- 8.2.1 Perde hoër as 93cm op 2½ jaar sal nie vir registrasie in aanmerking kom nie.
- 8.3 Geen vul sal in aanmerking kom vir 2½ jaar keuring indien ouerskap van die vul nie geverifieer is nie. Genoemde verifikasie moet gedoen word deur 'n DNS profiel en die Vereniging moet in besit wees van so 'n profiel wat ouerskap van beide ouers bevestig.
- 8.4 Geen dier wat nie aan die minimum standaard soos deur die Raad neergelê is voldoen nie, sal vir aantekening of registrasie in aanmerking kom nie.
- 8.5 Die aantekening of registrasie van alle diere van die ras deur die Vereniging word op aanbeveling van die Genootskap gedoen, en elke teler wat sulke perde het moet 'n rekord hou, waarin die geboortedatums van alle vullens aangeteken word tesame met besonderhede oor die geslag en teling asook van verkope, vrektes, kastrasies, steriliserings, ens., in gebreke waarvan verdere inskrywings deur die Raad gediskwalifiseer of geweier mag word. Telers kan te eniger tyd deur 'n keurder gelas word om sodanige verslae vir inspeksie voor te lê. Al die gemelde inligting moet by die Genootskap en die Vereniging ingedien word.
- 8.6 Die geboortekennisgewing sal die volgende verklaring bevat –
- "Ek verklaar dat die afstamming, telingsbesonderhede en identifikasiemerke van die dier/diere wat hierin beskryf is juis is en dat aan al die vereistes van die Grondwet van die Genootskap en die Vereniging met betrekking tot geboortekennisgewings voldoen is."
- 8.7 Geen geboortekennisgewing van 'n dier wat *in utero* ingevoer is, sal deur die Raad aanbeveel word nie tensy die moeder deur die Vereniging aangeteken of geregistreeer is en tensy die aansoek vergesel gaan van –
- 8.7.1 'n dekkingsertifikaat geëndosseer deur die rasgenootskap in die land van oorsprong of deur 'n insgelyks geëndosseerde insemineringertifikaat (afhangende daarvan of die bevrugting deur natuurlike dekking of kunsmatige inseminering veroorsaak is); en
- 8.7.2 bewys dat die ouers voldoen aan die vereistes soos deur die Raad van tyd tot tyd bepaal.
- 8.8 Aansoekvorms met betrekking tot perde wat kunsmatig verwek is of ontstaan het deur inovulering moet so geëndosseer word. Ook moet alle aantekening- en registrasiesertifikate wat deur die Vereniging uitgereik word ten opsigte van enige dier wat deur kunsmatige inseminering verwek is of ontstaan het deur inovulering onderskeidelik die afkorting "KI" of "ET" agter die naam van die dier op enige sodanige aantekening- of registrasiesertifikaat bevat.
- 8.9 Geen dier wat ingevoer word sal vir aantekening of registrasie geskik wees nie tensy die aansoek vir aantekening of registrasie vergesel gaan van –
- 8.9.1 'n sertifikaat van aantekening of registrasie of uitvoer uitgereik deur 'n bevoegde gesag in die land van herkoms;
- 8.9.2 'n bewys tot dien effekte dat die betrokke dier aan die vereistes soos van tyd tot tyd bepaal, voldoen;
- 8.9.3 'n volledige twee-generasie uitgebreide stamboom; en
- 8.9.4 'n verklaring dat die dier op die datum soos aangedui op die plaas aangekom het.
- 8.10 Kleurmerke op alle ingevoerde diere waarvoor 'n aansoek vir aantekening of registrasie ingedien word, moet ooreenstem met die kleurmerk soos op die aantekening-, registrasie- en/of invoersertifikaat voorkom en wat tot bevrediging van die Genootskap en die Vereniging is. Waar geen uitkenningsmerke voorkom nie, moet bewys van identiteit tot bevrediging van die Genootskap en die Vereniging gelewer word.

- 8.11 Aantekening- of registrasiesertifikate sal deur die Vereniging uitgereik word ten opsigte van alle ingevoerde diere.
- 8.12 Aansoeke vir die registrasie van ingevoerde diere of die aantekening of registrasie van diere wat verwek is uit ingevoerde semen of eiselle sal vergesel gaan van outentieke uitvoersertifikate wat deur sodanige bevoegde gesag in die land van oorsprong uitgereik is soos van tyd tot tyd deur die Genootskap en die Vereniging goedgekeur.
- 8.13 Aansoek vir keuring en aantekening of registrasie van ingevoerde diere moet binne 90 dae na hul aankoms in die land gedoen word.

9. KEURING EN PLIGTE VAN DIE KEURDER/S EN PRODUKSIEVEREISTES

- 9.1 Die Raad sal 'n keurder/s aanstel om alle diere wat vir aantekening of registrasie in aanmerking kom, te keur. Finale keuring is verpligtend op die ouderdom van 5 jaar. Indien moontlik sal alle telers wat diere vir keuring wil aanbied een keer per jaar besoek word.
- 9.2 Keurders sal die neergelegde keuringstelsel toepas (Bylae C).
- 9.3 'n Keurder sal elke dier wat vir registrasie in aanmerking kom, keur nadat die geboortekenningsgewingbewys daarvan aan hom voorgelê is. Hy moet homself vergewis dat die identifikasie, ouderdom, ens. van die dier reg aangegee is en ooreenstem met die dier wat vir keuring aangebied word. Verder moet hy tot eie bevrediging seker maak dat die dier in alle opsigte voldoen aan die rasstandaard en aan minimum prestasievereistes soos van tyd tot tyd deur die Raad bepaal.
- 9.4 Enige teler wat nie met 'n keurder se beslissing tevrede is nie, mag binne drie weke na die keuring appèl aanteken by die Sekretaris. Sodanige appèl moet van 'n deposito, soos van tyd tot tyd deur die Raad bepaal word, vergesel gaan. 'n Appèlraad wat deur die Raad van die Genootskap aangewys word, sal dan die betrokke dier of diere keur en indien die appèl slaag, sal die deposito terugbetaal word. Indien nie, verbeur die appellant sy deposito en is verantwoordelik vir alle bykomstige kostes.
- 9.5 Die keurders in diens van die Genootskap mag altyd as reklame-agente optree en demonstrasies en lesings op geleë plekke hou waar dit moontlik is om plaaslike boere saam te trek.
- 9.6 Keurders mag perde van telers klassifiseer en gradeer teen sodanige tarief as wat die Raad van tyd tot tyd mag bepaal.
- 9.7 'n Keurder/s mag in opdrag van die Raad van tyd tot tyd sonder vooraf waarskuwing 'n algemene keuring van enige stoet doen.
- 9.8 Keurders mag nie tydens keuring instruksies of kommissie van telers of nie-lede aanvaar om die koop en verkoop van diere te bewerkstellig nie.
- 9.9 Geen teler mag as keurder van sy eie diere optree nie.
- 9.10 Keuringsgelde soos van tyd tot tyd bepaal mag word sal in alle gevalle deur die applikant betaalbaar wees.

10. REKORDS VAN DIERE

- 10.1 Perde wat in die Vulboek ingeskryf is en wat voldoen aan die vereistes met betrekking tot keuring en aantekening of registrasie soos in die Verordeninge neergelê is, word in die Kuddeboek ingeskryf. (Bylae B)
- 10.2 Die Kuddeboek sal die nommer, die vader en moeder se nommers, die datum van geboorte, die naam van die teler en eienaar en die datum van keuring weergee.
- 10.3 Op aansoek deur die Genootskap sal sertifikate van aantekening of registrasie deur die Vereniging

uitgereik word, ten opsigte van alle diere wat in die Kuddeboek ingeskryf is. Sodanige sertifikate sal die besonderhede van kleurmerke en die nommers van die ouers toon.

11. REÛLS MET BETREKKING TOT KUNSMATIGE INSEMINERING (K.I.)

- 11.1 Diere wat in ooreenstemming met die Wet deur kunsmatig inseminering verwek is, sal vir aantekening of registrasie in aanmerking kom op voorwaarde dat aan al die vereistes van die Grondwet met betrekking tot aantekening of registrasie *mutatis mutandis* voldoen is.
- 11.2 Geen geboortekennisgewing van diere wat so verwek is, sal met die oog op aantekening of registrasie deur die Genootskap aanvaar word nie, tensy dit geëndosseer is "deur Kunsmatige Inseminering verwek".
- 11.3 Indien verskillende hingste vir die verskaffing van semen gebruik word vir die kunsmatige inseminering van dieselfde merrie, minder as 50 dae uitmekaar, sal geen nageslag wat verwek mag word vir aantekening/registrasie in aanmerking kom nie, ongeag die bepalings van subverordening 11.1 hiervan tensy die vaderskap deur DNS bevestig is.
- 11.4 Die Genootskap behou die reg om deur middel van sy ampsdraers toesig te hou oor en/of inspeksie uit te voer aangaande die noukeurige aantekening van die toepassing van kunsmatige inseminering deur sy telers.
- 11.5 Die Genootskap behou die reg om te weier om nageslag wat deur kunsmatige inseminering verwek is, aan te teken of te laat registreer indien enige van die reëls en regulasies wat deur die Genootskap neergelê is, nie ten volle nagekom is nie.
- 11.6 Telers wat in die Gebied buite Suid-Afrika woonagtig is en wat die voorregte van die aantekening en registrasie van diere geniet, mag aansoek doen om die aantekening of registrasie van kunsmatig verwekte nageslag: Op voorwaarde dat die semen verkry word van 'n bron wat deur die Genootskap goedgekeur is; en verder op voorwaarde dat die opvang van die semen, die hantering daarvan, die inseminering van diere en die hou van verslae so gedoen word as wat die Genootskap van tyd tot tyd mag goedkeur.
- 11.7 Onderhewig aan die bepalings van die Wet mag individuele telers onbeperkte hoeveelhede semen van hul eie hingste vir gebruik op hul eie merries opvang, bevries en vir 'n onbepaalde tydperk opberg.
- 11.8 Indien 'n dier waarvan semen opgevang is vir kunsmatige inseminering, verkoop word moet die verkoper van sodanige dier 'n sertifikaat aan die nuwe eienaar daarvan verstrek waarin aangedui word dat semen van die hings voor sodanige verkoop aldus opgevang is, en waarin die name van alle vorige eienaars van die dier aangedui word en hy moet 'n afskrif van sodanige sertifikaat aan die Vereniging verstrek.
- 11.9 Onderhewig aan die bepalings van Artikel 7(5) van die Wet, sal die afstammeling wat deur die gebruik van bevrore semen verwek word vir aantekening of registrasie in aanmerking kom: Met dien verstande dat –
- 11.9.1 volledige besonderhede van eienaarskap van die betrokke dier aan die Genootskap voorgelê is;
- 11.9.2 die DNS laboratoriumnommer van die dier by die Genootskap en die Vereniging ingedien is; en
- 11.9.3 daar aan al die vereistes van die Grondwet met betrekking tot geboortekennisgewing of aantekening en registrasie voldoen is (waar dit van toepassing is).

12. REÛLS MET BETREKKING TOT DIE OPVANG VAN EISELLE EN EMBRIO-OORPLASINGS (E.O.)

- 12.1 Nageslag wat in ooreenstemming met die bepalings van die Wet deur embryo-oorplasing ontstaan het, sal vir aantekening of registrasie in aanmerking kom: Op voorwaarde dat –
- 12.1.1 aan die vereistes van die Grondwet *mutatis mutandis* voldoen is;
 - 12.1.2 ouerskap van elke vul voortspruitend uit 'n eisel-oorplasing deur DNS bevestig is;
 - 12.1.3 die volgende dokumente binne 120 dae na inovulering ingedien word:
 - 12.1.3.1 die DNS laboratoriumnommers van die eiselskenker, die semenskenker en die embryo-ontvanger; en
 - 12.1.3.2 'n sertifikaat deur 'n veearts, embryo-oorplaser of in die geval van binne-kudde embryo-oorplasing die eienaar of 'n persoon voltyds in sy diens te dien effekte dat die bepalings van die Wet nagekom is;
 - 12.1.4 die geboortekennisgewing moet vergesel gaan van 'n DNS laboratoriumnommer van die betrokke nageslag en 'n sertifikaat te dien effekte dat ouerskap soos aangegee korrek is;
 - 12.1.5 beide die semenskenker en die eiselskenker vir sodanige doeleindes deur die Raad goedgekeur is wie ook die reg sal hê om die aantal nageslag wat ontstaan het van die eiselle van 'n enkele eiselskenker, te beperk vir aanvaarding vir aantekening of registrasie; en
 - 12.1.6 nageslag wat deur embryo-oorplasing ontstaan het sal vir aantekening of registrasie aanvaar word onderworpe daaraan dat die betrokke nageslag geïnspekteer word en voldoen aan die minimum vereistes soos deur die Raad bepaal mag word vir die betrokke afdeling van die Kuddeboek.
- 12.2 Telers wat in die Gebied buite Suid-Afrika woonagtig is sal die voorreg van aantekening en registrasie geniet ooreenkomstig die bepalings van die Wet en mag aansoek doen vir registrasie van nageslag wat deur embryo-oorplasing ontstaan het: Op voorwaarde dat die eiselle verkry is van 'n bron wat deur die Genootskap goedgekeur is; en verder op voorwaarde dat die opvang van eiselle, die hantering daarvan, die embryo-oorplasing van diere en die hou van verslae op so 'n wyse gedoen word as wat die Vereniging van tyd tot tyd mag bepaal.
- 12.3 Indien 'n merrie waarvan eiselle opgevang was vir die doel van inovulering verkoop word, moet die verkoper van sodanige merrie aan die nuwe eienaar 'n sertifikaat verstrek waarin dit aangedui word dat eiselle van sodanige merrie opgevang was voor die datum van verkoop en moet hy die Genootskap en die Vereniging van 'n soortgelyke sertifikaat voorsien.
- 12.4 Die Genootskap behou die reg voor om te weier om nageslag wat deur embryo-oorplasing ontstaan het vir aantekening of registrasie aan te beveel indien enige van hierdie Verordeninge nie ten volle nagekom is nie.
- 12.5 Nageslag wat deur embryo-oorplasing met ingevoerde embryo's ontstaan het, sal vir aantekening of registrasie in aanmerking kom op voorwaarde dat aan al die vereistes van die Grondwet *mutatis mutandis* voldoen is.
- 12.6 Die vereistes vir aantekening of registrasie sal dieselfde wees as dié vir ingevoerde diere.
- 12.7 Sodanige ingevoerde embryo's moet in die land van oorsprong opgevang word deur 'n bevoegde liggaam (goedgekeur deur die Direktoraat: Diergesondheid) van eiselskenkers wat aan die minimum vereistes voldoen soos deur die Genootskap bepaal en goedgekeur is deur die Vereniging vir die invoer van eiselle en, indien bevrug, moet sodanige eiselle bevrug wees met die semen van 'n hings wat eweneens aan die minimum vereistes voldoen soos bepaal deur die Genootskap en goedgekeur is deur die Vereniging.
- 13. INGEVOERDE EISELLE**
- Die geboortekennisgewing van nageslag wat deur embryo-oorplasing met ingevoerde eiselle ontstaan het moet, onderhewig aan die bepalings van Verordening 12, ook vergesel gaan van –
- 13.1 'n sertifikaat deur 'n erkende bevoegde liggaam in die land van oorsprong uitgereik en waarop aangedui word –

- 13.1.1 die naam, identifikasie- en registrasienommer van die eiselskenker;
- 13.1.2 die datum en plek van opvangs;
- 13.1.3 die aantal lewensvatbare eiselle opgevang van die betrokke eiselskenker;
- 13.1.4 dat die eiselle opgevang is vir uitvoer na die Gebied; en
- 13.1.5 die naam en adres van die invoerder; en

- 13.2 in die geval van 'n embrio ook 'n sertifikaat behoorlik geteken deur 'n erkende bevoegde liggaam in die land van oorsprong en waarop aangedui word –
 - 13.2.1 dat die bevrugting deur kunsmatige inseminering teweeggebring is; en
 - 13.2.2 die naam, identifikasie- en registrasienommer van die betrokke semen-skenker asook die datum en plek van inseminering.

14. REGISTRASIESERTIFIKATE

14.1 Veranderings of byvoegings op registrasiesertifikate

Enige wysiging van of byvoeging tot die inligting of besonderhede wat amptelik op enige registrasiesertifikaat voorkom en wat nie deur die Hoofbestuurder van die Vereniging geparafeer is nie, of enige ongemagtigde endossement of opmerking op sodanige sertifikaat sal sodanige sertifikaat ongeldig maak.

14.2 Duplikaat registrasiesertifikate

14.2.1 'n Duplikaat van die oorspronklike registrasiesertifikaat van 'n dier sal op aansoek, na aanbeveling van die Genootskap, deur die Vereniging uitgereik word indien daar tot bevrediging van die Vereniging bewys gelewer kan word dat die oorspronklike verlore is, per ongeluk vernietig is, of in die besit is van 'n persoon wat verkeerdelik weier om dit aan die persoon wat daarop geregtig is, te oorhandig.

14.2.2 Die aansoek om 'n duplikaat registrasiesertifikaat moet vergesel gaan van 'n verklaring deur die aansoeker, wat die eienaar van die betrokke dier moet wees. Sodanige aansoek en verklaring moet aan die Sekretaris gerig word, tesame met sodanige gelde as wat die Raad van tyd tot tyd mag voorskryf.

14.3 Kennisgewing van gebeure wat die kansellering van aantekening-, registrasie- en geboortekennisgewingsertifikate noodsaak

Indien 'n dier wat aangeteken of geregistreer is of vir aantekening of registrasie in aanmerking kom vrek, gekastreer of gesteriliseer word, of vir ander dan teeldoeleindes verkoop word, moet die Sekretaris binne 30 dae na sodanige gebeure daarvan in kennis gestel word.

14.4 Sertifikaat van uitgebreide stamboom

Enige persoon mag deur die Genootskap by die Vereniging aansoek doen om 'n sertifikaat van 'n uitgebreide stamboom met betrekking tot 'n dier wat aangeteken of geregistreer is of ten opsigte waarvan 'n geboortekennisgewingbewys uitgereik is en indien moontlik sal so 'n sertifikaat van uitgebreide stamboom uitgereik word. Elke sodanige aansoek moet van die voorgeskrewe gelde vergesel gaan soos van tyd tot tyd deur die Raad bepaal mag word.

14.5 Uitvoersertifikate

Aantekening- of registrasiesertifikate is die uitvoersertifikate van die Genootskap.

15. DNS TOETSE

15.1 Ouerskapverifikasie

Ongeag die bepalings van Verordening 7 behou die Raad die reg voor om te eniger tyd indien dit nodig geag word, 'n DNS profiel van enige dier te vereis met die oog op ouerskapbepaling. Die koste verbonde aan sodanige ouerskapbepaling sal deur die eienaar gedra word. In gevalle waar die Genootskap dit vereis en die toetse positief is, soos op die Vulkennisgewing aangedui, dra die Genootskap slegs die laboratoriumkoste. Indien toetse toon dat die besonderhede op die

Vulkennisgewing foutief is, is die teler vir alle koste verantwoordelik. In gevalle egter waar enige twyfel bestaan aan die kant van die teler of eienaar met betrekking tot die ouerskap van 'n dier, en 'n DNS tipering gedoen word, moet die koste deur die persoon gedra word wat daarvoor aansoek gedoen het.

15.2 Dwerfstatus

Vanaf 1 Julie 2020 sal geen perd in aanmerking kom vir 2 ½ jaar keuring indien die dwergstatus van die vul nie bekend is nie. Genoemde bepaling moet deur 'n DNS toets gedoen word en die Genootskap moet in besit van so 'n dwergstatus profiel wees. Indien die ouerskap van beide ouers bevestig is en beide ouers negatief getoets is as draers van die ACAN D1, D2, D3 of D4 dwerggeen mutasies, mag die perd sonder sy eie dwergstatus bepaling in aanmerking kom vir 2 ½ jaar keuring en oorweeg word vir registrasie. Reunperde is vrygestel van hierdie vereiste.

16. OORDRAGTE

- 16.1 Vir alle verkope of verwisseling van eienaarskap van aangetekende of geregistreerde diere of diere wat vir aantekening of registrasie in aanmerking kom of embryo-ontvangers, moet aansoek vir oordrag aan die koper of nuwe eienaar gedoen word deur die verkoper of oordraer wie die oordraggelde moet betaal. Die Genootskap sal sodanige aansoeke by die Vereniging indien.
- 16.2 Sodanige aansoek om oordrag moet binne 30 dae na die oordragdatum van die betrokke dier aan die Sekretaris gepos, oorhandig of elektronies in kennis gestel word op voorwaarde dat indien die aansoek later as 30 dae maar minder as 60 dae na die oordragdatum aan die Sekretaris gepos, oorhandig of elektronies in kennis gestel word of meer as 60 maar minder as 90 dae na dié datum, die gelde wat met betrekking tot die oordrag verskuldig is respektiewelik dubbeld en driemaal die voorgeskrewe gelde sal wees.
- 16.3 'n Aansoek om sodanige oordrag wat meer as 90 dae na die oordragdatum aan die Sekretaris gepos, oorhandig of elektronies gestuur word, sal deur die Raad oorweeg word en kan aanvaar word na die betaling van sodanige gelde as wat die Raad mag bepaal.
- 16.4 'n Aansoek om die oordrag van 'n dier moet vergesel gaan van die geboortekennis-gewingsertifikaat, aantekening- of registrasiesertifikaat van die betrokke dier waarop die volle naam en adres van die nuwe eienaar asook die handtekening van die verkoper of oordraer en die oordragdatum ingevul is in die spatie wat daarvoor op die sertifikaat gelaat is.
- 16.5 Vir die doel van voorafgaande Subverordening 16.4 word die oordragdatum gereken as die datum waarop die dier die besit van die verkoper of oordraer verlaat.
- 16.6 Indien dragtige merries verkoop word moet die verkoper 'n dekking- of inseminering-sertifikaat aan die koper voorsien (afhangende of bevrugting deur natuurlike dekking of kunsmatige inseminering teweeggebring is). Die dekkingsertifikaat moet die identifikasie-merke en registrasienommers van die betrokke hings en merrie verstrek asook die dekkingsdatum.
- 16.7 Verandering van eienaarskap sal as plaasgevind beskou word indien –
- 16.7.1 'n dier verkoop, geruil of geskenk is;
 - 16.7.2 'n dier geërf is;
 - 16.7.3 'n vennootskap ontbind is; en
 - 16.7.4 'n hings aangeteken of geregistreer is in die naam van twee of meer eienaars en enigeen (of meer) afstand doen van sy/hul aandeel in die hings wat so aangeteken of geregistreer is of om enige rede afstand doen van sy/hul belange in genoemde aangetekende of geregistreerde hings.
- 16.8 Indien die Raad van mening is dat die verkoper of oordraer heeltemal in gebreke bly of weier om enige stappe te doen ten uitvoer van sodanige oordrag en in gebreke bly of weier om die oorspronklike aantekening- of registrasiesertifikaat of geboortekennisgewingsertifikaat te verskaf en indien die nuwe eienaar bereid is om sodanige gelde as wat die Raad mag voorskryf, te betaal, mag die Raad met die

toestemming van die Vereniging, sodanige stappe doen as wat nodig geag mag word om te voldoen aan die wense van die koper of nuwe eienaar, op voorwaarde dat in so 'n geval die boetebepalings wat in Subverordeninge 16.2 en 16.3 hiervan neergelê is, op die nuwe eienaar van toepassing is.

- 16.9 In gevalle van oordrag tussen eggenotes of van ouer na kind of van kind na ouer (insluitende aangetroude- en kleinkinders), ongeag die feit of dit deur verkoop, skenking of nalating geskied, sal slegs die helfte van die voorgeskrewe gelde betaalbaar wees.
- 16.10 Indien dieselfde persoon meer as een stoetery het moet kennis binne 30 dae aan die Genootskap en die Vereniging gegee word op die neergelegde vorm van verskuiwing van enige aangetekende of geregistreerde of diere geskik vir aantekening of registrasie, vanaf die een stoetery na die ander op soortgelyke wyse as kennisgewing van oordrag van sodanige diere. Oordraggelde sal egter nie in sodanige gevalle betaalbaar wees nie.

17. HERSTEL VAN DIERE IN DIE KUDDEBOEK

Indien die geboortekennisgewingsertifikaat of aantekening- of registrasiesertifikaat van 'n dier gekanselleer is, sal sodanige dier slegs op aanbeveling van die Raad in die Kuddeboek herstel word: Op voorwaarde dat die aansoek om herstelling van die dier deur dieselfde persoon aangevra word wat om die kansellering daarvan aansoek gedoen het. Die aansoek om die herstelling van 'n dier moet vergesel gaan van die gelde wat van tyd tot tyd hiervoor deur die Raad bepaal word.

18. KANSELLERING VAN AANTEKENING OF REGISTRASIE

- 18.1 Die Raad mag die Sekretaris versoek om by die Vereniging aansoek te doen om die kansellering van die aantekening of registrasie van enige dier wat –
- 18.1.1 verkeerdelik aangeteken of geregistreer is;
 - 18.1.2 aangeteken of geregistreer is op grond van valse of bedrieglike inligting wat deur die eienaar verstrekk is; of
 - 18.1.3 aangeteken of geregistreer is nadat die eienaar versuim het om te voldoen aan enige Verordening waaraan voldoen moes word om te verseker dat die aantekening of registrasie foutloos geskied.
- 18.2 Voordat daar so om die kansellering van 'n aantekening- of registrasiesertifikaat aansoek gedoen word, moet die Sekretaris die eienaar van die dier minstens 30 dae voor die tyd skriftelik, na sy jongste bekende adres, kennis gee van sy voorneme om dit te doen.

19. WERKNEMERS VAN DIE GENOOTSAP

Geen werknemer van die Genootskap sal, behalwe in die uitvoering van sy pligte as sodanige werknemer, enige dienste lewer of verbonde wees aan enige besigheid met betrekking tot die koop en verkoop van diere nie.

